

## AN SGEILP LEABHRAICHEAN

Uibhist, no tràigh Bharraidh, no Tràigh Mhór Uige an Leódhas. Tha sinn an dòchas nach dio-chuimhnich e iad an ath leabhar a chuireas e a mach. Ach is math agus is ro-mhath na thug e dhuinn an so.

Chan urrainn dhuinn a bhith cho riarachtaichte leis an earrann sin de'n leabhar a tha ann an sgrìobhadh. Tha an leabhar air a roinn 'na chòig earrannan, is tha beagan aig John L. Weir ri ràdh aig toiseach gach earrainn—mu thimchioll dùthaich Bhurns, Glaschu, agus Abhainn Chluaidh, dùthaich Scott, Dun-éideann, agus a' Ghaidhealtachd. Tha e car sean-fhasanta 'na chainnt; tha blas linn Victoria oirre, is tha dreach an linn sin air pàirt de na smuaintean aige. Bheir iad barrachd riarachaidh do Shasunnaich agus do Ghoill eile do nach aithne Alba na bheir iad do luchd ar dùthcha-ne.

Tha an leabhar daor, ach tha e grinn air a chur ri chéile, is bheir e iomadach uair-a-thìde de thoileachas do'n t-sùil.

*"America's Man of Destiny," le Kevin McCann.*

*Heinemann, 10/6.*

Faodaidh gun can cuid nach eil cuid no gnothuich aig an leabhar so ri luchd leughaidh Gàidhlig. Ach chan ann mar sin a tha. Anns na duilleagan so, tha sinn am beachd iomradh a dheanamh air leabhraichean—Beurla no Gaidhlig no Greugais—a tha sinn an dùil a tha math agus gu feum d'ar luchd leughaidh. Agus co-dhiùbh, is e fuinne thana da-rìreabh a bhios aig luchd Gàidhlig mur a leugh iad ach na leabhraichean a tha a' tighinn a mach ann an Gàidhlig an diugh.

Tha an leabhar mu dheidhinn an t-Sinealair Eisenhower—duine air an robh an saoghal an crochadh fad làithean cogaidh; duine air am bi an saoghal an crochadh fad iomadh bliadhna fhathast. So agaibh sgeulachd mu bhalach beag cumanta a dh'èirich gu bhith 'na aon de phrìomh fhir-stiùiridh an t-saoghail anns am bheil sinn beò.

Rugadh Eisenhower ann am baile beag Abilene ann an Ameiriga—mac phàrantan aig nach robh anns an t-saoghal ach na chumadh beò iad air éiginn. Chuir e e fhéin troimh an sgoil le bhith ag oibreachadh ann am bùtha bhainne air an oidhche agus aig a chuid leabhraichean troimh an latha. Cha b'e an taghadh no an roghainn, ach am fortan a chuir a Cholaide Airm Westpoint e, agus ann an sin cha robh e ach mar fhear 's an t-sreath. Ars' e fhéin mu bhalach eile a bha còmhla ris—balach dìchiollach a fhuair air adhart—"Chan eil fios ciamar a chaidh leis cho math; bha cus eagail air riaghailt a bhriseadh."

Tha an leabhar, ann an dòigh shìmplidh, thaitnich, a leantainn beatha Eisenhower a nuas chun an latha 'n diugh—gus an do dh'fhàg e an t-arm agus an do dh'aontaich e a dhol air adhart airson taghaidh mar Cheann-suidhe Ameiriga. Dh'aontaich e sin a dhèanamh, chan ann a chionn gum bheil e déidheil air féin-ghlòir ach a chionn agus gun do dhleas e e mar a dhleasdanas. Sin suaicheantas Eisenhower—dleasdanas. Agus so leabhar a chuireas an céill dhùibh ann an dòigh thaitnich mar a lean e cùrsa an dleasdanais fad a làithean.